

Herbstzeit

Was war om letzde Sunndaach ferr enn scheene Septemberdaach. Ich habb nooch emm Middaachesse uff de Terrass gesetze, habb mich von de Sunn bescheine losse unn habb in die Luft geguckt. Koo Wölkche war om Himmel, nit vill Wind war in de Beem, unn obwohl merr so e schee Wedder hadde, sinn die Fluchzeuche nit zum Londe iwver Flerschem eroikumme. Glaabt merrs, wärs so gewese, ich hätt koon klare Gedonke fasse kenne. Ich habb dess schunn emol mett de Chinesisch Wasserfolder vergliche, die dich verrickt mächt nor deshalb weilde uff de nächsde Troppe wartst, unn so mache dich die Fluchzeuche verrickt, weil wenn dem oone soin Krach grad erum iss spitzde schunn widder die Ohrn, weil dess nächsde schunn von weidem ze heern iss. Ess macht dich verrickt, du konnst nit drauße sitze, du musst ins Haus unn Diern unn Fenster zumache. Unn dess obwohl ich schunn eifers gesacht habb, dess was iss mett dene Fluchzeuche misse merr ertraache, dess sinn merr dem Fluchhafe unn soiner Leistung schuldisch, awwer mehr derfs halt nit wernn.

Also om Himmel koo Fliecher unn aach koo Veechel mehr, weil die Schwalwe sinn fort unn aach die Mauersechler. Ab unn zu fällt e braun Blatt vom Äbbelboom unn der oone odder onnere Schmetterling flattert um die Geranie odder setzt sich uff die warme Terrasseplatte. Unn uffem Gras grad vor de Terrass habb ich innere halwe Stund noochenonner e Omselpärche, zwaa Türkedauwe, e Ringeldaub unn e Atzel, also e Elster, nooch Futter suche sehe unn in de Beem ringserum hott enn Eichelhäher gerätscht unn e Kohlmeis iss dorchs Geäst geschluppt.

Was iss die Atzel ferr enn scheene Voochel! Wenn merr sich still verhält, wenn merr sich nit beweeweche dut, kann merr se bewunnern. Weil jetz, wo merr se nimmi fortjaache muss weilse koo Nester mehr ausräume kann, wo se sich grad so dorschs Lewe schlaache muss wie onnern Veechel aach, mett Werm unn Raupe unn Käfer odder was waaß ich ferr Diern, doo kann merr se in aller Ruh betrachte. Wennse so iwvers Gras marschirt unn ihr schwarze Flüchelfedern in Grün unn Blau und sogar Purpur schillern, doo hott merr de Oidruck, die waaß wie schee se iss unn merr leist e bisje Abbitt, dass merr ihr im Sommer hinnerher geschennt hott.

Doo sitz ich also uff de Terrass, seh de Veechel zu unn denk nooch, unn obwohl de Himmel blau iss unn die Sunn scheint waaß ich, ess iss Herbst. Jetz sinn die junge Veechel gefütterert, sinn ausgeflooche unn misse sehe, wie se iwver de Winder kumme. E paar von dene unn aach von de Alde wernn de Winder nit iwverlewe.

Geht's uns nit aach so wie de Veechel? Unser Junge sinn ausgeflooche, sie hawwe ihr eiche Familie, misse seh wiese sich unn ihr Kinner nit nor iwver de nächsde Winder bringe. So wies mir aach gemacht hawwe unn wies unser Eltern gemacht hawwe unn wies aach unser Enkel emol mache misse. Doch ferr jeden von uns, aach ferr die vor uns unn die nooch uns kam unn kimmt emol die Zeit, wo merr uff de Terrass sitze, die Sunn genieße, de Veechel zugucke unn noochdenke kann weil merr waaß, dass de Herbst kumme iss. Weil alles soi Zeit hott, die Veechel unn aach mir.

Eiern Honnes